

# Els vegnan sulets

Il chantun Grischun è confruntà cun daplis fugitivs minorens

■ (anr/ac) La cumpart da fugitivs minorens che arrivon en Svizra senza accompagnament da persunas creschidas s'augmenta. Il chantun Grischun è medemamain confruntà cun la sfida da porscher structuradas adattadas a quels fugitivs.

En ina resposta sin ina incumbensa dal deputà Tarcisius Caviezel (pld Tavau) piglia la regenza posiziun davart il dumber da fugitivs minorens che vegnan surdads a la surveglianza dal chantun Grischun. In chantun che ha da surpigliar 2,7 procent da tut las persunas che tschentan la dumonda per asil en Svizra. Tenor las indicaziuns da la regenza grischuna è la cumpart da fugitivs minorens che arrivon en Svizra creschida surproporzionalmain ed uschia era la cumpart surdada al chantun Grischun. En ils onns 2008 en fin 2013 è vegnids surdads al chantun Grischun 41 fugitivs minorens. Sulet l'onn 2014 èn già arrivads 28 fugitivs minorens. En fin la fin fanadur 2015 èn anc ina giada vegnids surdads 33 fugitivs minorens senza accompagnament da persunas creschidas a la surveglianza grischuna. Il deputà Tarcisius Caviezel e ses consutsegnaders han pretendì en ina incumbensa inoltrada a chaschun da la sessiun dal zercladur passà in concept per tgirar ils fugitivs minorens. En quella incumbensa ha il deputà fatg valair diversas mancanzas en la tgira actuala dals fugitivs minorens da chasa en il center da transit a Laret. Sco insufficienta ha il deputà classificatgà la tgira da quellas persunas da chasa sut il medem tetg sco las ulteriuras persunas che han inoltrà ina dumonda per asil. Betg sulet la tgira ha Tarcisius Caviezel taxà per insufficienta, mabain era la scolaziun purschida principalmain quai che pertutga il viadi da scola da Tavau en fin en il lieu da scola a Cazas. Vinavant ha il deputà fatg attent a la situaziun geografica ed economica da Tavau che na por-



Adina dapli fugitivs minorens arrivon senza accompagnament da persunas creschidas en il chantun Grischun.

KEYSTONE

schia betg in ambient adattà per ils fugitivs minorens per la scolaziun professiunala. Gist perquai ch'ìls manaschis da Tavau porschian per gronda part sulet plazzas stagionalas. Tarcisius Caviezel ha intimà la regenza da reponderar il center da transit a Laret sco albiert per fugitivs minorens e da stgaffir in concept da tgira e scolaziun adattà per ils fugitivs giuvens arrivads en Svizra ed en il chantun Grischun senza accompagnament da persunas creschidas.

## La regenza è pronta d'acceptar l'incumbensa

La regenza grischuna ha scrit en sia risposta dad esser pronta dad acceptar

l'incumbensa en il senn da las atgnas explicaziuns fatgas en la resposta. En quella resposta n'è la regenza betg entrada en detagl en ils puncts taxads dal deputà da Tavau per insufficients. Ella ha annunzià d'avair realisà sco mesira urgenta purschidas per las singuals gruppas da fugitivs minorens il fanadur 2015. Il basegn per las diversas gruppas da fugitivs sa differenzieschia, scriva la regenza en sia resposta. Las giuvnas sajan integradas en la purschida da la claustra da Cazas che scoleschia er ils giuvens fugitivs minorens. La tgira da quels fugitivs succedia a moda surdepartamentala. Durant la procedura

d'asil saja l'uffizi per migraziun e dretg civil responsabel. Per cas ch'il status da fugitiv vegnia reconuschì u la dimora concedida surpiglia l'uffizi social la responsabladad. Ils fugitivs minorens hajan il dretg da retschaiver las mesiras entaifer la protecziun dals uffants. Per integrar e promover a lunga vista l'indipendenza economica dovrian quels giuvnils tgira ed ina structura dal di cun scola e pli tard cun scolaziun professiunala betg sulet en fin ch'els hajan cuntanschì la maiorenitad, mabain en fin che la emprima scolaziun professiunala saja terminada, scriva la regenza en sia resposta.